

## SA BUKA TE EMOSI **Sa Vinabakala**

Pa totoso tanisa poropita Emosi, si ele paqaha rua sa binañara koasa popoa. Keke binañara si koa la pa kali gede, sa nana ɳati vasileana si pa Sameria. Ta pozae na binañara pa Izireli si asa. Keke binañara pule si pa Ziuda meke sa ɳati vasileana tanisa si Zerusalem. Ta pozae na binañara pa Ziuda si asa.

Sa poropita Emosi si mae gua koasa popoa pa kali binañara pa Ziuda. Pa Tekoa sa popoa tanisa meke na sepati mo si asa. Ba tioko ia Tamasa si asa pude la koasa butubutu banara pa Izireli, pude la tarae nia sa Nana zinama pa Betolo, sa vasina tanisa ɳati hope tanisa banara pa Izireli. Sa totoso sapu la tozi vura nia sa sa zinama te Tamasa si e Zeroboami vina rua si koa banara pa Izireli, pa kaiqa vuaheni zuapa gogoto lima navulu puta sipu lopu ele podo se Zisu Karisito. Ba ka visavisa rane mo si ene tarae si asa.

Sa inavoso sapu vala nia Tamasa koa sa si la gua koari tie tagotago. Sarini sapu tagotago si tagotago va hola, meke arini pu malana si koa malana va hola tugo. Meke saripu tagotago si tavetavete ni rini sari pu malana; hiko i rini meke ɳonovala i rini pude tagotago dia.

Ke sa vina balau te Emosi pa Betolo si tozia sapu kote mae gua pa Izipi meke pa Asiria sa tinahuara, si be lopu kekere si arini. Hadu ia sa ɳati hiama pa Betolo se Emosi, lopu ta hivae si

asa, pule la pa Ziuda, guni nia sa. Ba korona se Emosi, na ta garunu mae koe Tamasa si asa, gua si asa.

Pa nana kinorokorotae la koe Izireli, si podalae si asa koari na kana te Izireli pu koa vari likohae nia sa popoa Izireli. Sari vinakilasa tadi na kana hire si zama kekenu ni sa meke tiqe kamo la koe Izireli; sari Siria, Pilisitia, Taea, Edomu, Amoni, Moabi, Ziuda meke tiqe e Izireli. Sari naba neta meke made si tavetavete ni sa, sapu varigara la pa zuapa; sa naba zuapa si hokoto, gua, ginguana koari pa Hiburu. Ke totoso varigara la pa zuapa sari sinea tadi kasa si na soku hola, ele pada mo, lopu boka beto, gua ginguana. Ke kaqu tava kilasa. Totoso zamani sa sari ka zuapa sinea tadi pa Izireli si zamani pule sa sari ka zuapa vina kilasa sina ele soku hola sari dia sinea, meke lopu boka noso.

### **Sari na Nati Pinaqapaqahana sa Buka**

Sa vina kilasa koari na butubutu pu tata koasa butubutu bañara pa Izireli. Hinia 1:1 kamo hinia 2:5

Sa vina kilasa koasa butubutu bañara pa Izireli. Hinia 2:6 kamo hinia 6:14

Sari ka lima dinogodogorae. Hinia 7:1 kamo hinia 9:15

### *Sari Zinama Tuketukele*

<sup>1</sup> Hire sari na zinama te Emosi, keke koari na sepati pa Tekoa, sa nana dinogodogorae pa guguana Izireli sapu vata dogoro nia Tamasa koa sa, karua vuaheni sipu lopu ele kamo sa niu lavata, totoso e Uzaea si bañara pa Ziuda meke e

Zeroboami sa tuna koreo e Zehoasi si bañara pa Izireli.\*

*Bugoro ni Tamasa sari Tie Izireli*

<sup>2</sup> Zama se Emosi:\*

“Se Zihova si kurumu vura mae gua pa Toqere Zaione  
meke sa mamalainina si lulusu vura pa Zerusalema;  
sari duduli pa pezara vasina kopu sipi sari na sepati si mate,  
meke sari huda pa batu toqere Kameli si harahara.”

*Sa Vina Kilasa te Zihova pa Siria*

<sup>3</sup> Hiera gua si zama nia e Zihova:

“Koari ka neta sinea te Damasikasi\* meke kamo ka made sinea,  
si lopu kaqu va kekere pule ia Rau sa vina kilasa,  
sina ele pada mo sari na dia sinea meke lopu boka beto.

Koa gua sapu la huara va kaleania sa sa popoa Qileadi meke vagia sa,\*

<sup>4</sup> ke kote garunu la nika si Arau koasa vetu bañara sapu kuria Hazaelo\*,  
meke kote ta sulu palae sari vasidi ta gobadi te Beni Hadadi sa bañara.

<sup>5</sup> Kote seke gore nia Rau sa tukutuku sasada koasa goba pa Damasikasi;

\* **1:1** 2 Ban 15:1-7; 2 Koron 26:1-23; 2 Ban 14:23-29      \* **1:2** Zol

3:16      \* **1:3** Damasikasi si na natu vasileana tadi na tie pa Siria.

\* **1:3** Ais 17:1-3; Zer 49:2-27; Zak 9:1      \* **1:4** Hazaelo si na Bañara kekenu sapu tuti gore la koe Beni Hadadi.

kote huara ia Rau sa bañara sapu koa pa  
 Lolomo pa Aveni\*  
 meke asa pu tuqena sa kolu binañara pa Beti  
 Idini.  
 Sari tie pa Siria si kote ta raovo pule la pa  
 Kiri,”  
 zama gua se Zihova.

*Sa Vina Kilasa te Zihova koasa Popoa pa  
 Pilisitia*

<sup>6</sup> Hiera gua si zama nia e Zihova:  
 “Koari ka ñeta sinea te Qaza meke kamo ka  
 made,  
 si lopu kaqu va kekere pule ia Rau sa vina  
 kilasa,  
 sina ele pada mo sari na dia sinea meke lopu  
 boka beto.  
 Koa gua sapu sari vasileana dodurudi si hoke  
 raovo taloani sa  
 meke la holuholu ni sa pa Edomu,\*  
<sup>7</sup> ke kote garunu la nika si Arau koari na goba pa  
 Qaza  
 sapu kote sulu i sari nana vasileana ta  
 gobadi.  
<sup>8</sup> Kote va mate pania Rau sa bañara pa Asidodi  
 meke asa pu tuqena sa kolu binañara pa  
 Asikeloni.  
 Kote taliri la nia Rau sa Limaqu pa Ekoroni,  
 osolae mate beto sari pa Pilisitia,”  
 zama gua se Zihova sa Bañara.

---

\* **1:5** Lolomo Aveni ginguana si “Lolomo Hahanana Kaleana.”  
 Beti Idini ginguana si “Vetu Bibibolo”. \* **1:6** Ais 14:29-31; Zer  
 47:1-7; Izk 25:15-17; Zol 3:4-8; Zepa 2:4-7; Zak 9:5-7

*Sa Vina Kilasa te Zihova koasa Popoa pa Taea*

<sup>9</sup> Hiera gua si zama nia e Zihova:  
 “Koari ka neta sinea te Taea, meke kamo ka  
     made,  
     si lopu kaqu va kekere pule ia Rau sa vina  
         kilasa,  
     sina ele pada mo sari na dia sinea meke lopu  
         boka beto.  
 Koa gua sapu sari vasileana dodurudi si hoke la  
     holuholu ni sa pa Edomu,  
     lopu kopu nia rini sa dia vinariva egoi  
         tinamatasi koari na Qua tie,\*  
<sup>10</sup> ke kote garunu la nika si Arau koari na goba  
     pa Taea  
     sapu kote sulu i sari nana vasileana ta  
         gobadi.”

*Sa Vina Kilasa te Zihova koasa Popoa pa  
 Edomu*

<sup>11</sup> Hiera gua si zama nia e Zihova:  
 “Koari ka neta sinea te Edomu meke kamo ka  
     made,  
     si lopu kaqu va kekere pule ia Rau sa vina  
         kilasa,  
     sina ele pada mo sari na dia sinea meke lopu  
         boka beto.  
 Koa gua sapu hadu luli nia vedara sa sa tasina  
     koreo,  
     loke nana tataru hokara,  
 pa nana binugoro si raza pilipule ia mo sa si asa  
     meke sa nana tinañaziri si hurunu lamo,”\*

---

\* **1:9** Ais 23:1-18; Izk 26:1 kamo hinia 28:19; Zol 3:4-8; Zak 9:1-4;  
 Mt 11:21-22; Lk 10:13-14      \* **1:11** Ais 34:5-17, 63:1-6; Zer 49:7-22;  
 Izk 25:12-14, 35:1-15; Obd 1:1-14; Mal 1:2-5

**12** ke kote garunu la nika si Arau pa Temani  
sapu kote sulu i sari vasileana ta gobadi pa Bozira.”

*Sa Vina Kilasa te Zihova koasa Popoa pa Amoni*

**13** Hieraa gua si zama nia e Zihova:  
“Koari ka ɳeta sinea te Amoni meke kamo ka made,  
si lopu kote va kekere pule ia Rau sa vina kilasa,  
sina ele pada mo sari na dia sinea meke lopu boka beto.

Koa gua sapu hova va rikati sa tiadi sari barikaleqe molumoludi pa Qileadi  
pude hada i sari nana voloso pepeso,\*

**14** ke kote garunu la nika si Arau koari na goba pa Raba  
sapu kote sulu i sari nana vasileana ta gobadi pa vari korapadi rina iraɳa na kukili koasa rane varipera,  
pa korapa givusu ɳiburuna pa totoso raneboni.

**15** Sa nana baɳara meke sari nana koimata,  
si kote varigara la tugo pa tinaraovo,”  
zama gua se Zihova.

## 2

*Sa Vina Kilasa te Zihova koasa Popoa Moabi*

**1** Hieraa gua si zama nia e Zihova:  
“Koari ka ɳeta sinea te Moabi meke kamo ka made,

---

\* **1:13** Zer 49:1-6; Izk 21:28-32, 25:1-7; Zepa 2:8-11

si lopu kaqu va kekere pule ia Rau sa vina  
kilasa,  
sina ele pada mo sari na dia sinea meke lopu  
boka beto.

Koa gua sapu sulu i sa, guana sulu binu,  
sari susurina sa bañara pa Edomu,\*

<sup>2</sup> ke kote garunu la nika si Arau koari pa Moabi  
sapu kote sulu i sari vasileana ta gobadi pa  
Kerioti.

Se Moabi si kote tava gore pa keke vinaripera  
nomana  
pa vari korapadi rina iraña na kukili vinar-  
ipera meke na kabona sa buki.

<sup>3</sup> Kote va mate pania Rau sa nana bañara  
meke va matei sari doduru nana koimata,”  
zama gua se Zihova.

### *Sa Vina Kilasa te Zihova koasa Popoa pa Ziuda*

<sup>4</sup> Hiera gua si zama nia e Zihova:  
“Koari ka ñeta sinea te Ziuda meke kamo ka  
made,  
si lopu kote va kekere pule ia Rau sa vina  
kilasa,  
sina ele pada mo sari na dia sinea meke lopu  
boka beto.

Koa gua sapu ele kilu pania rini sa tinarae te  
Zihova  
meke lopu kopuni rini sari Nana ginarunu,  
ke ta turana va seu si arini koari na tamasa  
kokohadi,  
sari tamasa sapu luli ri tiatamadia pukerane,  
<sup>5</sup> ke kote garunu la nika si Arau koari pa Ziuda

\* **2:1** Ais 15:1 kamo hinia 16:14, 25:10-12; Zer 48:1-47; Izk 25:8-11; Zepa 2:8-11

sapu kote sulu i sari vasileana ta gobadi pa Zerusalema.”

*Sa Vina Kilasa te Zihova koasa Popoa pa Izireli*

<sup>6</sup> Hiera gua si zama nia e Zihova:

“Koari ka ɳeta sinea tamugamu pa Izireli meke  
kamo ka made,  
si lopu kaqu va kekere pule ia Rau sa vina  
kilasa,  
sina ele pada mo sari na mia sinea meke lopu  
boka beto.

Koa gua sapu holuholu ni siliva gamu sari tie  
tonotodi,  
meke koari na sadolo mo holuholu ni gamu sari  
tie sapu loke dia.

<sup>7</sup> Neti gamu batudi sari tie malaɳa  
guana neti mia pa kavuruna sa pepeso  
meke lopu poni tinoɳoto gamu sarini pu ta  
ɳoɳovala.

Tamana meke sa tuna koreo si la ia si keke vineki  
mo  
meke ɳoɳovala ia gamu sa Pozaqu Hopena.

<sup>8</sup> Seke tinarae si gamu totoso eko gamu pa kalidi  
ri doduru hope,  
koari na pokon sapu ta tuqe vagidi pude tana  
gale lopu ele ta lipudi.\*

Pa korapa vetu tanisa dia tamasa  
si napoi rini sari vaeni sapu tabarani ri  
tie malaɳa totoso tava lipulipu hoboro si  
arini.

<sup>9</sup> Seke goreni Arau sari na tie Amoraiti pa kenu  
dia,  
vea ululu guana huda sida si arini,

---

\* **2:8** Tiro laia Diut 23:12-13.

meke vea *ninjira* guana huda oaku si arini.  
Sari vuvua tanisa panaulu si huari Rau  
meke gua tugo sari karosona pa kauruna.\*  
**10 Arau** vagi vurani gamu pa Izipi,  
meke turanā gamu koari ka made *navulu*  
puta vuaheni pa soloso qega  
pude poni gamu sa pepeso tadi na tie  
Amoraiti.  
**11 Va** noma sage i tugo Arau sari poropita pa vari  
korapadi ri tumia koreo  
meke vizata vagi tie Naziraiti\* koari mia tie  
vaqura.  
Vea, lopu hinokaradi si hire, gamu na tinoni pa  
Izireli?" zama vura gua se Zihova.\*  
**12 "Ba** va napo ni vaeni tu gamu sari tie Naziraiti  
meke zamai gamu sari poropita pude tukui  
*nuzudia.*  
**13 Ego**, kamahire si kote naqoto gamu Arau  
gua sa totopili susuranana huiti sapu ta  
mamatani sari qaqloto huiti ke qirato.  
**14 Arini** koa gamu pu haqala rerege si lopu kote  
govete,  
arini pu *ninjira* si kote malohoro tu,  
meke sa varane si lopu boka harupu pule  
nia.  
**15 Sa** tie gona bokala si kote rizu togolo pule,  
sa tie varipera sapu reregina ba lopu kote  
govete,  
sa tie koi hose ba lopu boka harupu pule nia.

\* **2:9** Diut 3:8-11 \* **2:11** Sa tie Naziraiti si na tie sapu va madi pule nia koe Zihova meke lopu napo vaeni meke lopu koto kalu si asa. Mi tiro laia sa buka Nab 6:1-21. \* **2:11** Nab 6:1-8

16 Sari tie varane sapu bokabokadi hola  
 ba kote dodohodi meke govete koa sa rane  
 asa,”  
 zama vura gua se Zihova.

### 3

1 Mi avoso mae! Hierā sa zinama te Zihova  
 sapu ta zutuni gamu, kei gamu tinoni pa Izireli,  
 gamu doduru pa butubutu Izireli sapu turana  
 vurani gamu Arau pa Izipi:

2 “Gamu mo sapu ele vizata gamu Arau  
 koari doduru butubutu pa popoa pepeso;  
 gua ke kote va kilasa gamu Arau  
 koari doduru mia sinea.”

#### *Sari Ninanasa Tanisa Poropita*

3 Boka ene varigara sari karua tie  
 sapu lopu variqetuedi pude ene varigara?

4 Boka kurumu pa nana bae sa laione  
 sipu lopu ele ari gana ginani?

5 Boka saputu vagi kurukuru sa sipata  
 totoso loke kurukuru si koa?

6 Pana ta avoso sa buki pa vasileana lavata,  
 si vea, lopu hoke neneqara sari tie?

Pana kamo si keke tinasuna pa vasileana lavata,  
 si vea lopu e Zihova tu va gevuria sia?

7 Hinokara sapu e Zihova Bañara si lopu hoke  
 tavetia si keketona  
 be lopu ele vivinei vurani Sa sari Nana  
 hiniva

koari Nana nabulu, sari poropita.

8 Ele kurumu sa laione.  
 Esei si lopu kote matagutu?

E Zihova Bañara si ele zama.  
 Esei si lopu boka zama nia sa kinorokorotae?

*Sa Tinahuara pa Sameria*

<sup>9</sup> Zama vura la koari na vasileana ta gobadi pa Asidodi

meke koari vasileana ta gobadi pa Izipi;

“Mi la varigara si gamu koari na toqere pa Sameria;

mi dogoria sa kinolura pa korapana sa

meke sa ɳinovaɳovala pa vari korapadia ari tie.”

<sup>10</sup> “Lopu tumae tavete va toɳoto si arini,” zama vura gua se Zihova,

“arini si va naqiti tinagotago ta saputu vagidi meke ta hikodi koari dia vasileana ta gobadi.”

<sup>11</sup> Gua ke hiera gua si zama nia e Zihova Baɳara:

“Nā kana kote mae vari likohae nia sa mia popoa; kote daku goren sa sari mia vasidi ɳiniradi meke hiko koari mia vasileana ta gobadi.”

<sup>12</sup> Hier a gua si zama nia e Zihova:

“Gua sapu harupu vagia sepati pa ɳuzuna sa laione

sari karua susuri nene babe vasi kali talina, si kote ta harupu gua tugo asa sari pa Izireli, arini sapu habotu pa Sameria pa hukihukiri dia teqe

meke pa dia habohabotuana arilaedi pa Damasikasi.”

<sup>13</sup> “Mi avosia si hie, mamu zama vura la nia koasa butubutu te Zekopi,” zama vura gua sa Baɳara, se Zihova sa Tamasa Tadi na Qeto Minate.

<sup>14</sup> “Koasa rane sapu va kilasia Rau se Izireli koari nana sinea,

si kote huara pani Rau sari hope pa Betolo;  
 sari kikihodi ri na hope si kote ta seke palae  
 meke hoqa la pa pepeso.\*  
 15 Kote huara pani Rau sari dia vetu tana totoso  
 ibu  
 meke gua tugo sari vetu tana totoso mañini;  
 sari vetu sapu tava sari koari na livo elopaniti si  
 kote ta huara  
 meke sari na vetu nomadi na arilaedi si kote  
 ta daku gore,”  
 zama vura gua se Zihova.

## 4

1 Mi avosia sa zinama hie, gamu na barikaleqe  
 pu deana guana bulumakao pa Basani,  
 gamu pu koa koasa toqere pa Sameria,  
 gamu si noñovali sarini pu malaña meke arini  
 pu loke gedi  
 meke zama la koari mia palabatu, “Paleke  
 poni gami napo,” gua.  
 2 Gua sapu hopena se Zihova Bañara si toko-  
 tokoro si Asa:  
 “Hinokara sa totoso asa si kote kamo mae,  
 sa totoso kote ta rita qaqahere si gamu meke ta  
 turanya taloa,  
 doduru gamu si kote ta soto vinetuñu.  
 3 Hopeke gamu si kote vura tonoto taloa  
 kote vura gua koari na lopa pa goba,  
 meke kote ta gona vura la gua pa toqere  
 Hemoni,”  
 zama vura gua se Zihova.

*Lopu Boka Tava Tumatumae se Izireli*

---

\* **3:14** 2 Ban 23:15

**4** “La pa Betolo, mamu tavete va kaleana vasina:  
 la pa Qiliqali, mamu tavete va kaleana nono  
 la tu.

Paleke maeni sari mia vinukivukihi doduru  
 munumunu,  
 mia keke pa manege pa doduru vina ɳeta  
 vuaheni.

**5** Sari mia bereti koa i na isiti<sup>d</sup> si mae variponi ni  
 pude zama leana,  
 mamu vahesi puleni gamu koari mia vinar-  
 iponi moka;

gamu tie Izireli, vivinei va titie ni,  
 ura arini si qetuqetu ni gamu pude taveti,”  
 zama vura gua se Zihova sa Bañara.

**6** “Arau poni gamu tia kokobadi pa doduru  
 vasileana lavata  
 meke va ovia gamu koari na vasileana  
 hitekedi,  
 ba lopukekere pule mae si gamu koa Rau,”  
 zama vura gua se Zihova.

**7** “Tuqe pule nia tugo Rau sa ruku koa gamu  
 totoso ɳeta sidara koa meke pakepakete,  
 gua.

Ponia ruku Arau si keke vasileana,  
 ba va noso ia Rau koa sa keke pa kalina.  
 Keke inuma si vagi ruku  
 ba keke si loketoɳa meke popa taloa.

**8** Sari tie si tedeve hata kolo pa keke vasileana la  
 pa keke  
 ba lopu boka vagi va leana kolo pude napo,  
 gua ba lopukekere pule mae si gamu koa  
 Rau,”  
 zama vura gua se Zihova.

9 “Soku totoso si seke i Rau sari mia inuma meke  
     gua tugo sari inuma vaeni,  
     sekeni givusu mañini meke nokinoki Rau.  
 Na kupokupo henai sari mia piqi na huda olive,  
     gua ba lopu kekere pule mae si gamu koa  
     Rau,”

zama vura gua se Zihova.

10 “Sari na oza si garunu atu ni Rau koa gamu  
     gua sapu tavete ia Rau pa Izipi.

Va mate i Rau pa vedara sari mia tie vaqura,  
     turañae mia hose ta zau vagidi.

Sari isumia si va siñi ni humaña muzi tomate  
     Rau sapu mae guadi koasa mia vinarigara  
     ipi,  
     gua ba lopu kekere pule mae si gamu koa  
     Rau,”

zama vura gua se Zihova.

11 “Arau va mate pani sari kaiqa koa gamu  
     gua sapu huara i Arau si pa Sodomu meke  
     Qomora.

Agoi si guana itito sapu ta saputu vagina pa nika,  
     gua ba lopu kekere pule mae si gamu koa  
     Rau,”

zama vura gua se Zihova.\*

12 “Gua ke hie si kote tavete atu nia Arau koa  
     gamu na butubutu Izireli,  
     meke sina kote tavete atu nia Rau koa gamu  
     na tie Izireli,  
     ke mi va nama pude tutuvu ia sa mia  
     Tamasa.”

13 Asa pu va podaki sari toqere,  
     pu tavetena sa givusu,

\* **4:11** Zen 19:24

meke tozi vurani sari Nana binalabala koari  
na tie,  
Asa pu va iliri la nia pa hinuporo sa vaqavaqasa,  
meke tete koari na vasidi ululudi pa popoa  
pepeso,  
e Zihova Tamasa tadi na Qeto Minate sa  
Pozana Sa.

## 5

*Sa Tinioko Pude Kekere*

<sup>1</sup> Mi avosia sa zinama hie, gamu na butubutu Izireli, sa kinera lukalukana hie pa gugua mia gamu:

<sup>2</sup> “Hoqa se Izireli, sa Vineki Vaqura,  
lopu pude tekulu pule,  
ta luara palae pa nana popoa soti,  
meke loke tie si koa pude ovulu sage nia.”

<sup>3</sup> Hiera gua si zama nia e Zihova sa Banara:  
“Sa vasileana lavata sapu garunu taloa keke tina  
varane,  
si kote keke gogoto mo si kekere pule;  
sa vasileana hite sapu garunu taloa keke gogoto  
varane  
si kote ka manege puta mo si toa.”

<sup>4</sup> Hiera gua si zama la nia e Zihova koasa butubutu Izireli:

“Hata Au pude mi toa;  
<sup>5</sup> lopu la hata ia se Betolo,

lopu la pa Qiliqali,  
lopu ene va seu la pa Biasiba.

Ura se Qiliqali si kote ta raovo taloa,  
meke se Betolo si kote murimuri taloa.”

<sup>6</sup> Hata ia se Zihova pude mi toa,

pude lopu gua si kote halala si Asa pa  
 butubutu te Zosepa guana nika;  
 kote variva mate si asa,  
 meke loke tie pa Betolo kote boka va noso ia.  
<sup>7</sup> Agoi pu iliri va pasa ia sa ɻinonõo  
 meke neti gore nia pa pepeso sa tinonoto.  
<sup>8</sup> E Zihova si asa pu tavetedi sari pinopino  
 Peliadesi meke Orioni,  
 pu iliri va vaqavaqasa ia sa hinuporo  
 meke va huporo ia sa rane la pa boni,  
 pu tioko vagi kolo pa lamana  
 pude va ruku boboso ia sa pepeso,  
 e Zihova sa Pozana Sa.\*  
<sup>9</sup> Asa tuturei huara i sari vasidi niniradi  
 meke ilasi sari vasileana ta gobadi.  
<sup>10</sup> Gamu si kana i si arini pu gegegese pa koti  
 meke hakohako ni si arini pu tozi ia sa  
 hinokara.  
<sup>11</sup> Neti gamu sari pu malaña  
 meke zuzuki gamu pude poni gamu huiti.  
 Gua ke, sari vetu patu leleadi sapu ele kuri i  
 gamu  
 si lopu kote koa i gamu;  
 sari inuma vaeni masurudi sapu ele lete i gamu,  
 si lopu kote napo i gamu sari vaeni koa rini.  
<sup>12</sup> Ura Arau tumae ni Qua visa ɻavulu sari mia  
 tinavete kaleadi,  
 meke vea noma gua sari mia sinea,  
 nonovali gamu sari tie tonoto meke vagi tin-  
 abara golomo  
 meke hukati gamu pa koti sari vinilasa va  
 tonoto koari na tie malana.

---

\* **5:8** Zob 9:9, 38:31

**13** Gua ke sa tie gilae si kote lopu kulu pa totoso  
gua arini,  
ura kaleadi sari totoso.

**14** Mi hata ia sapu leanana lopu sapu kaleanana,  
pude mi toa.

Meke se Zihova Tamasa Tadi na Qeto Minate si  
kote koa koa gamu,  
gua sapu tozi ia gamu si gua tugo si Asa.

**15** Kana ia mo sapu kaleana, tataru nia sapu  
leana;  
kopu nia sa vinilasa va tonoto pa korapa  
vetu varipitui.

Hokara kote koa ia tataru se Zihova Tamasa Tadi  
na Qeto Minate  
koari ka visavisa tie koa holadi pa tutina e  
Zosepa.

**16** Gua ke hiera gua si zama nia e Zihova, se  
Zihova Tamasa Tadi na Qeto Minate:

“Na uui si kote koa pa doduru sisirana  
meke na kabo ta sigiti si kote ta avoso koari  
doduru varivarigarana.

Sari tie lelete si kote ta tioko pude taruqoqo  
meke ari tie ta tabaradi pude lukalukana si  
kote uui.

**17** Na uui si kote pa doduru inuma vaeni,  
ura na kote ene nuquru gua si Arau pa vari  
korapa mia,”

zama gua se Zihova.

**18** Mi talotana si gamu pu aqa nia sa rane te  
Zihova!

Na vea ke aqa qetuqetu nia gamu sa rane te  
Zihova?

Asa rane si kote huporo sa popoa, lopu  
kalalasa.

- 19 Kote gua sa tie sapu govete nia sa si keke laione  
     meke tutuvu ia sa si keke bea,  
     gua na tie sapu nuquru pa nana vetu  
     meke va magogoso ia sa limana pa gobagoba  
     si ta garata noki tu.
- 20 Vea, lopu kote huporo tu sa rane te Zihova,  
     lopu kalalasa,  
     dudukurumu toa, loke vasi kalalasana?
- 21 Zama se Zihova, "Arau kana hola i, lopu hiva  
     hokara ni Arau sari mia rane inevaña;  
     maledere hola ni Arau sari mia vinarigara.\*
- 22 Pana paleke mae ni gamu koa Rau sari  
     vinukivukihi va uququ meke vinariponi  
     huiti,  
     ba lopu kote qetu ni Arau.  
 Pana paleke mae vinukivukihi binaere leleadi  
     gamu,  
     ba lopu kote arilaedi koa Rau si arini.
- 23 Va taloa i sari mia kinera vinahesi vevehedi!  
     Koroqu avosi Arau sari mia mike hapu sara.
- 24 Ba mi va malumu ia sa ḥinono pude totolo  
     guana ovuku,  
     sa ḥinonoto pude guana tototolo sapu lopu  
     hite popa!
- 25 Kei gamu na butubutu Izireli, vea, hoke  
     paleke mae ni gamu koa Rau sari mia  
     vinukivukihi meke vinariponi  
     koari ka made ḥavulu puta vuaheni pa  
     soloso qega?\*<sup>\*</sup>
- 26 Lokari. Ba kamahire sa kinehana sa mia beku  
     Sakuti sapu poza nia bañara gamu si ovulu  
     sage nia gamu,

---

\* 5:21 Ais 1:11-14

\* 5:25 TTA 7:42-43

meke Kaivani sa mia tamasa pinopino  
sapu telemia taveti.

- <sup>27</sup> Gua ke kote garunu taloa ni gamu Arau pa  
tinaraovo la pa kali la Damasikasi,”  
zama gua se Zihova, sa Tamasa Tadi na Qeto  
Minate sa Pozana Sa.

## 6

### *Sa Tinahuara Tanisa Popoa Izireli*

- <sup>1</sup> Mi talotaña gamu pu koa va leleana pa Zaione,  
meke koa gamu pu lopu koa matagutu pa  
toqere Sameria,  
gamu na koimata noma mia koasa ɳati butubutu  
bañara koari doduru,  
koa gamu pu hoke mae hata tinokae sari tie  
pa Izireli!
- <sup>2</sup> La pa Kalane mamu la dogoria;  
beto mamu la koassa vasileana nomana pa  
Hamati,  
mamu gore la pa Qati pa popoa Pilisitia.  
Vea, noma hola ni rini sari karua butubutu  
bañara pa Izireli meke Ziuda?  
Sari dia pepeso si noma hola ni si  
tamugamu?
- <sup>3</sup> Lokari! Sa rane tinahuara si koromia balabala  
ia,  
meke va tata mae ia gamu sa rane vinaripitui  
variva matagutuna.
- <sup>4</sup> Eko mia koari na teqe sapu tava kadakada livo  
elopaniti,  
zokozokoro mia pa habohabotuana malo-  
horodi.  
Lami ta vizatadi si hena i gamu

meke na tuna bulumakao nobokodi.

- <sup>5</sup> Mikemike va leana mia koari mia hapu gua e Devita  
meke kera ni sari kinera vaquaradi pu taveti gamu koari na mia ivivu na hapu.

- <sup>6</sup> Na vovoina vaeni nomadi si naponi gamu  
meke lumulumu ni gamu sari lumu sapu humaṇa lea,  
ba lopu talotaṇa nia gamu sa tinahuara te Izireli.

- <sup>7</sup> Gua ke gamu si kote kekenu hokara ta raovo taloa;  
sari mia inevaṇa na hahanana zokozokoro si kote noso.

- <sup>8</sup> Se Zihova sa Bañara si tokotokoro pa Pozana Sa, se Zihova sa Tamasa Tadi na Qeto Minate, Asa si zama vura guahe:

“Arau kana hola ia sa vina titie te Zekopi  
meke etulu i Arau sari nana vasileana ta gobadi.

Kote vala nia Rau sa vasileana lavata hie koari na kana  
meke sari doduru tinitona pa korapana,” gua si Asa.

- <sup>9</sup> Be ka manege puta tie si koa hola pa keke vetu, si kote mate tugo si arini.

<sup>10</sup> Meke be mae si keke turaṇadia pude paleke pani pa vetu sari tinidia pude sulu i, gua, meke nanasia sa si asa sapu korapa tome vasina, “Vea, koa dia pule kaiqa tie?”

Kote olaṇa si asa, “Lokari,” gua, meke kote hinoqa zama pule sa turaṇadia, “Mokomoko! Lopu kaqu poza ia gita sa Pozana e Zihova,” kote gua.

- 11 Ura ele vala nia e Zihova sa ginarunu,  
     meke kote huara va umumu ia Sa sa vetu  
         nomana,  
     meke sa vetu hitekena si kote va inete ia Sa.
- 12 Vea, sari hose si hoke haqala tugo pa patupatu?  
     Hoke la tavete inuma pa kolo lamana sari  
         tie?  
 Lokari! Ba gamu ele iliri la nia pa poizini sa  
     ninono,  
     meke sa vuana sa tinoŋoto si va pasa ia  
         gamu.
- 13 Qetu nia gamu sapu zau vagi ia gamu si pa  
     Lodeba\*,  
     meke zama guahe, “Vea, lopu pa nada  
         nininira soti tu vagi nia gita si pa  
         Kanaimi?”
- 14 Ura zama vura guahe se Zihova sa Tamasa Tadi  
     na Qeto Minate,  
     “Kei, gamu na butubutu Izireli, kote va  
         gevuru ia Rau si keke butubutu baŋara  
         pude mae raza igo,  
     kote raza na ɻoŋovala ia rini sa doduruna sa mia  
         popoa,  
     podalae pa karovoana pa toqere sapu la gua  
         pa Hamati kamo la koasa lolomo pa Ovuku  
         Zodani,” gua si Asa.

## 7

### *Sa Rovana Kupokupo*

- 1 Hier a gua si va dogoro nau e Zihova sa  
     Baŋara pa dinogodogorae: Korapa va nama  
     rovana kupokupo si Asa, mudina sa totoso

---

\* **6:13** Sa gnuana Lodeba si “loketona” meke Kanaimi gnuana  
     si “nininira”.

pakepakete tanisa hinia tanisa bañara meke totoso podalae tuvulu pule sari linetelete. <sup>2</sup> Totoso hena beto pani ri kupokupo sari doduru linetelete koasa popoa, si kabo vura si arau, “Zihova Bañara, taleoso ni gami! Vea meke kote boka toa se Zekopi? Nake hitekena hite mo si asa!”

<sup>3</sup> Ke hobe binalabala se Zihova.

“Lopu kote ta evaña si hie,” zama gua se Zihova Bañara.

### *Sa Nika*

<sup>4</sup> Hier gua si va dogoro nau e Zihova sa Bañara: Se Zihova sa Bañara si korapa titioko pa korapa nika pude va kilasi sari Nana tinoni; sa lamana si va popa pania Sa meke sa nika si podalae gania sa popoa. <sup>5</sup> Ke kukili vura si arau, “Zihova sa Bañara, tepa sisigitu atu si arau kua Goi pude noso si Agoi! Vea meke kote boka toa se Zekopi? Nake hitekena hite mo si asa!”

<sup>6</sup> Ke hobe binalabala se Zihova.

“Hie ba lopu kote ta evaña tugo,” zama gua se Zihova sa Bañara.

### *Sa Iku sapu Koa ia Mamamata*

<sup>7</sup> Hier gua si va dogoro nau Sa si arau: Se Zihova Bañara si korapa turu kapae Nana pa keke goba sapu tonoto sage luli ia sa sa tinoñoto tanisa iku kua ia mamamata, meke sa iku kua ia mamamata si kua nana pa Limana Sa. <sup>8</sup> Meke nanasa au e Zihova si arau, “Nasa si dogoria goi, ta Emosi?” gua si Asa.

Meke olaña si arau, “Na iku sapu kua ia na mamamata pude pada ia sa tinoñoto tana goba.”

Meke zama se Zihova, “Doño mae, sa iku koa ia mamamata hie si veko ia Rau pa korapadi ri Qua tinoni pa Izireli; lopu kaqu poni pule ni totoso Arau si arini pude kekere.

<sup>9</sup> Sari vasidi ululudi te Aisake si kote ta huara meke sari vasina hopedi pa Izireli si kote na remoremo;  
kote ovulu sagea Arau sa Qua vedara pude seke va matea sa butubutu bañara te Zeroboami.”

### *Sari Emosi meke Amazaea*

<sup>10</sup> Meke garunu la nia e Amazaea, sa hiama pa Betolo, si keke inavoso koe Zeroboami, sa banara pa Izireli: “Se Emosi si korapa qoraqora nigo si agoi bañara, pa Betolo pa kokorapana sa popoa Izireli. Lopu leana la koasa popoa sari nana zinama. <sup>11</sup> Ura gua hie si zama nia Emosi:

‘Se Zeroboami si kote mate pa vedara,  
meke hinokara sari tie Izireli si kote ta raovo taloa,  
taloa va seu pa dia popoa soti,’ gua.”

<sup>12</sup> Meke zama se Amazaea koe Emosi, “Vura taloa, agoi na tie dodogorae! Pule la pa Ziuda. La korokorotae; mamu ta tabara vasina. <sup>13</sup> Lopu korokorotae pule pa Betolo, sina hie si na hope tanisa bañara meke na zelepade tanisa butubutu bañara pa Izireli,” guni nia sa.

<sup>14</sup> Olaña ia Emosi se Amazaea, “Arau si lopu na poropita meke lopu tuna keke poropita, ba na sepati si arau, meke na tie kopu huda sikamoa tugo si arau. <sup>15</sup> Ba vagi pani au e Zihova koasa qua tinavete kopu sipi meke zama au Sa, ‘La, mamu la korokorotae koari Qua tinoni pa Izireli,’

gua. <sup>16</sup> Ego kamahire, mu avosia sa zinama te Zihova. Zama si agoi, Lopu korokorotae la ia sa popoa Izireli, mamu noso, lopu korokorotae si agoi koasa butubutu te Aisake,” gua si goi.

<sup>17</sup> “Gua ke hiera gua si zama nia e Zihova: ‘Sa mua barikaleqe si kote ta evaŋae na maqota koasa vasileana lavata, meke sari tumu koreo meke vineki si kote mate pa vedara. Sa mua pepeso si kote ta pada meke ta hia, meke agoi telemu si kote mate pa keke popoa tadi na tie hyporo. Meke hinokara sa butubutu Izireli si kote la pa tinaraovo, seu taloa koasa dia popoa soti.’”

## 8

### *Huneke Sini ia na Vua Huda Saganadi*

<sup>1</sup> Hier gua si va dogoro nau e Zihova sa Bañara: na huneke sini ia na vua huda saganadi. <sup>2</sup> Meke nanasa si Asa, “Emosi, nasa si dogoria goi,” gua.

“Na huneke sini ia na vua huda saganadi,” olana gua si arau.

Meke zama se Zihova koa rau, “Sa totoso tadi na Qua tinoni pa Izireli si ele sagana; lopu kote rizu pania Arau sa dia vina kilasa.

<sup>3</sup> Zama vura gua si Arau Zihova sa Bañara, koasa rane asa, sari kinera pa Zelepade si kote ta iliri uui. Na soku hola tini tie matedi si kote eko pa doduru vasina! Loke tie si kaqu kulu!” gua se Zihova.

*Tinahuara Tadi pa Izireli*

- <sup>4</sup> Mi avosia si hie, gamu pu neti goren i saripu  
     loke gedi  
     meke va mate i saripu malaña koasa popoa,  
<sup>5</sup> meke zama guahe,  
     “Totoso sa kote hola sa rane hopena pa Sidara  
         Vaqura  
         pude mami holuholu huiti,  
     meke totoso sa kote hokoto sa Sabati  
         pude mami maketi huiti?”
- Va hola i gamu sari pada  
     va sage i sari hinolu  
     meke sekesekai koari na sikele kokohadi,  
<sup>6</sup> meke holu ni siliva sari tie malaña  
     meke sari pu loke gedi si holu ni sadolo mo,  
     sari remoremo huiti ta sara vagidi ba kote  
         holuholuni.
- <sup>7</sup> E Zihova si ele tokotokoro guahe koasa  
     Pozana Telena: “Arau lopu kote mulini ni sari  
     doduru tñitona sapu ele taveti rini.
- <sup>8</sup> Vea, lopu kote neneqara nia sa popoa si hie,  
     meke talotana sari doduru pu koa vasina?  
     Sa doduruna sa popoa si kote odu sage gua sa  
         Ovuku Naelo;  
         kote sage si asa meke lodu gore pule  
         gua sa ovuku pa Izipi.
- <sup>9</sup> Koasa rane asa, zama vura gua si Arau Zihova  
     Banara,  
     kote va lodu gore ia Rau sa rimata pa korapa rane  
         meke va huporo ia sa popoa pepeso pana  
         rane toa.
- <sup>10</sup> Kote iliri Arau sari mia totoso inevana la pa  
         tinalotana  
         meke doduru mia kinerakera la pa kinabo.

Kote va sageni gamu pokō baika Arau si gamu  
doduru  
meke neri i sari batu mia.

Kote tаветия Rau sa totoso asa pude guana totoso  
mate tanisa koburu ekeina,  
meke sa vina betona si kote guana keke rane  
pasana.

<sup>11</sup> Sari rane si korapa mae, zama vura gua si Arau  
Zihova Banara,  
totoso kote garunu mae nia Rau sa oza koasa  
popoa;

lopu na oza pa ginani babe na memeha hata kolo  
si asa,  
ba na oza pude lopu avosia sa zinama te  
Zihova.

<sup>12</sup> Sari tie si kote tedeve podalae pa Kolo Matena  
la pa kolo Meditareniani,  
meke kote hebala gua pa kali gede meke la  
pa kali gasa rimata,  
pude hata ia sa zinama te Zihova,  
ba lopu kote boka dogoria arini.

<sup>13</sup> Koasa rane asa  
sari barikaleqe vaqura leleadi meke sari koreo  
vaqura niniradi  
si kote mabubulu na memeha.

<sup>14</sup> Arini pu tokotokoro pa kinurekure te Sameria,  
babe zama, ‘Hinokara gua sapu toana sa  
mua tamasa agoi pa Dani,’  
babe ‘Hinokara gua sapu toana sa tamasa pa  
Biasiba,’  
si kote hoqa si arini,  
lopu pude tekulu sage pule.”

**9***Sa Vina Kilasa te Zihova*

- <sup>1</sup> Dogoria rau se Zihova sa Bañara turu Nana pa kalina sa hope, meke zama guahe si Asa:  
 “Seke pani sari batudi ri dedegerena sa Zelepadé  
 pude va niu ia sa nuqunuquruana.  
 Va hoqa mae i pa batudi ri doduru tie;  
 sarini pu koa hola si kote va mate i Arau pa  
 vedara.  
 Lopu keke si kote toa,  
 loke tie si kote govete.
- <sup>2</sup> Be geli gore la si arini pa vasina tadi na tie  
 matedi,  
 ba sa Limaqu kote la vagi vurani vasina.  
 Be haele sage la si arini pa manauru,  
 ba vasina kote vagi gore mae ni Arau.
- <sup>3</sup> Be la tome puleni si arini pa batu toqere Kameli,  
 ba kote tuqe vagi Rau si arini.  
 Be la tome Nau rini si Arau pa hubina sa lamana,  
 ba vasina kote garunia Rau sa noki lavata  
 pude garati.
- <sup>4</sup> Be ta hadu la pa tinaraovo si arini koari dia  
 kana,  
 ba vasina kote garunia Rau sa vedara pude  
 seke i.  
 Sa mataqu Rau si kote doño toto la mo koa rini  
 pude va kaleana i, lopu pude va leana i.”
- <sup>5</sup> Sa Bañara, se Zihova Tadi na Qeto Minate,  
 Asa tiqü ia sa popoa pepeso meke va kolo ia,  
 meke va kaboi sari tie;  
 sa doduruna sa popoa si kote odu sage gua pa  
 Naelo,  
 meke lodu gore pule gua sa ovuku pa Izipi.

- 6** Asa pu kuri ia sa Nana vetu bañara panaulu pa  
mañauru  
meke va sokirae ia Sa pa popoa pepeso,  
pu tioko vagi kolo pa lamana  
pude va ruku boboso ia sa pepeso,  
si e Zihova sa Pozana Sa.
- 7** “Vea, lopu kekenoño gua mo ari pa Itiopia  
si gamu pa Izireli koa Rau?”  
zama vura gua se Zihova.  
“Lopu Arau tu vagi vura nia se Izireli pa Izipi,  
sari tie Pilisitia pa Nusa Kiriti,  
meke ari Siria pa Kiri?
- 8** Hinokara sapu sari matana e Zihova sa Bañara  
si doño la koasa butubutu bañara sapu  
tavete va kaleana.  
Kote huara pania Rau  
koasa popoa pepeso,  
gua ba lopu kote huara beto taloa nia Rau  
sa butubutu te Zekopi,”  
zama vura gua se Zihova.
- 9** “Ura kote vala nia Rau sa ginarunu,  
meke kote niu ia Rau sa butubutu Izireli  
pa vari korapadi ri doduru butubutu  
gua sa huiti sapu ta paqaha koari na remore-  
mona,  
meke lopu keke boni si koa hola.
- 10** Doduru tie tavete va kaleana koari Qua tinoni  
si kote mate pa vedara,  
doduru arini pu zama guahe,  
‘Lopu kote tutuvia babe kamo gami na tina-  
suna si gami,’ gua.
- 11** Koasa rane asa si kote va vaqura pule ia Rau  
sa butubutu bañara te Devita sapu guana  
keke ipi hoqana.

Kote tuvaka pule i Rau sari vasidi sapu ele rikata,  
 tavete va leana pule i sari vasidi sapu  
 kaleana,  
 meke kuri pule ia gua sapu tatasana,\*  
<sup>12</sup> pude boka la zau vagi rini saripu koa hola pa  
 Edomu  
 meke sari doduru butubutu saripu vahesi Au  
 rini,”  
 zama vura gua se Zihova pu kote taveti sari  
 doduru hire.  
<sup>13</sup> “Sari rane si korapa mae, zama vura gua si  
 Arau Zihova,  
 totoso pakepakete sa tie si kote kamo ia mo sa tie  
 geli pepeso pude lelete,  
 meke sa tie lelete si kote kamo la ia mo sa tie  
 munamunala vaeni.  
 Na vaeni vaqura si kote zoloro koari na toa  
 meke totolo gore koari na toqere.  
<sup>14</sup> Kote turana pule mae ni Arau sari Qua tinoni  
 pa Izireli pu ta raovo taloadi;  
 kote kuri pule i rini sari vasileana ta huaradi  
 meke kote koa i rini.  
 Kote lete vaeni si arini meke napo i teledia;  
 kote tavete inuma si arini meke hena i ri sari  
 vuadi.  
<sup>15</sup> Kote lete ia Rau se Izireli pa dia pepeso soti,  
 meke lopu kaqu ta rabutu pule hokara  
 koasa pepeso sapu Arau poni lani koa rini,”  
 zama gua se Žihova mia Bañara.

---

\* 9:11 TTA 15:16-18

**Buka Hope  
The Holy Bible in the Roviana language of the  
Solomon Islands  
Buk Baibel long langguis Roviana long Solomon  
Islands**

copyright © 2016 Wycliffe Bible Translators, Inc.

Language: Roviana

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

    You include the above copyright and source information.

    You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-06

---

PDF generated using Haiola and XeLaTeX on 11 Nov 2022 from source files dated 30 Nov 2021

2a5324ac-61e8-5e5b-b226-f3d15850d7c5